

I. DISPOSICIÓN XERAIS**CONSELLERÍA DE MEDIO AMBIENTE E ORDENACIÓN DO TERRITORIO**

DECRETO 11/2018, do 18 de xaneiro, polo que se modifica o Decreto 193/2012, do 27 de setembro, polo que se regula o Observatorio Galego de Educación Ambiental.

O 4 de outubro de 2012 publicouse no *Diario Oficial de Galicia* número 190 o Decreto 193/2012, do 27 de setembro, polo que se regula o Observatorio Galego de Educación Ambiental.

Conforme sinala o seu artigo 1, o obxecto do Decreto 193/2012, do 27 de setembro, é regular as funcións e a composición do Observatorio Galego de Educación Ambiental.

Para tal efecto, o artigo 3 sinala como a finalidade principal do Observatorio Galego de Educación Ambiental o seguimento e avaliación da situación da educación ambiental na Comunidade Autónoma de Galicia, delimitando as súas funcións, e o artigo 4 procede a regular a composición deste observatorio, especificando as persoas a quen corresponde a Presidencia, a Vicepresidencia, así como as vogalías.

As novas estruturas orgánicas da Xunta de Galicia e da Vicepresidencia e das consellerías da Xunta de Galicia, aprobadas polos decretos 146/2016, do 13 de novembro, e 177/2016, do 15 de decembro, respectivamente, supuxeron cambios e modificacións nas denominacións e funcións de determinados órganos, afectando a composición das vogalías do Observatorio Galego de Educación Ambiental, polo que procede axustar tal composición a esta situación.

Igualmente, cómpre destacar as competencias e funcións atribuídas á Dirección Xeral de Patrimonio Natural polo artigo 12 do Decreto 167/2015, do 13 de novembro, polo que se establece a estrutura orgánica da Consellería de Medio Ambiente e Ordenación do Territorio. Este artigo 12 sinala que a Dirección Xeral de Patrimonio Natural exercerá as competencias e funcións atribuídas á consellería en materia de conservación, protección, uso sustentable, mellora e restauración do patrimonio natural e da biodiversidade de Galicia e dos seus elementos etnográficos e a súa preservación para as xeracións futuras e, en particular, atribúelle no parágrafo 1, letra c), a divulgación dos valores do patrimonio natural, a xestión dos hábitats naturais, da flora e fauna silvestre, das paisaxes naturais e dos elementos senlleiros da xea da Comunidade Autónoma galega.



A intrínseca relación entre a función de divulgación dos valores do patrimonio natural atribuída á Dirección Xeral de Patrimonio Natural e o concepto mesmo da educación ambiental configúrase como outro dos aspectos que aconsellan a modificación da composición do Observatorio Galego de Educación Ambiental, para poder así reflectir na súa composición esta evidente interrelación.

Polo exposto, a través deste decreto modifícase o Decreto 193/2012, do 27 de setembro, polo que se regula o Observatorio Galego de Educación Ambiental, en concreto, o seu artigo 4, co fin de axustar a súa composición aos aspectos anteriormente sinalados.

Neste mesmo sentido, procede incorporar na disposición derogatoria única un parágrafo no cal se recolle a derogación expresa da Orde do 10 de decembro de 1984, sobre protección do acivro (*Ilex aquifolium*, L.) no territorio da Comunidade Autónoma de Galicia (DOG número 240, do 15 de decembro de 1984), co obxecto de reforzar a seguridade xurídica que esta derogación supón no ámbito ambiental, dadas as dúbidas que nos ámbitos económico e social están a derivar desta orde, que carece ata a data dunha derogación en tal sentido e desde a premisa que na lexislación vixente sobre conservación da biodiversidade non está considerada a súa protección.

Na súa virtude, e en uso das atribucións conferidas pola Lei 1/1983, do 22 de febreiro, de normas reguladoras da Xunta e da súa Presidencia, e demais normativa concordante, e por proposta da persoa titular da Consellería de Medio Ambiente e Ordenación do Territorio, despois da deliberación do Consello da Xunta de Galicia, na súa reunión do día dezaioito de xaneiro de dous mil dezaioito,

DISPOÑO:

Artigo único. Modificación do Decreto 193/2012, do 27 de setembro, polo que se regula o Observatorio Galego de Educación Ambiental

Modifícase o artigo 4 do Decreto 193/2012, do 27 de setembro, polo que se regula o Observatorio Galego de Educación Ambiental, que queda redactado nos seguintes termos:

«Artigo 4. *Composición*

O Observatorio Galego de Educación Ambiental terá a seguinte composición, que tenderá a acadar unha participación equilibrada de homes e mulleres:

1. Presidencia: a persoa titular da consellería competente en materia de ambiente.



2. Vicepresidencia: a persoa titular do centro directivo competente en materia de patrimonio natural.

3. Vogais: os/as vogais do Observatorio Galego de Educación Ambiental serán propostos/as polos organismos, institucións e organizacións de Galicia que se relacionan a continuación:

a) Un/unha vogal designado/a polo centro directivo competente en materia de calidade ambiental e cambio climático.

b) Un/unha vogal designado/a polo centro directivo competente en materia de educación, formación profesional e innovación educativa.

c) Un/unha vogal designado/a polo centro directivo competente en materia de urbanismo e ordenación do territorio.

d) Un/unha vogal designado/a pola Dirección do Instituto de Estudos do Territorio.

e) Un/unha vogal designado/a polo centro directivo competente en materia de augas de Galicia.

f) Un/unha vogal designado/a polo Centro de Extensión Universitaria e Divulgación Ambiental de Galicia.

g) Un/unha vogal designado/a pola Sociedade Galega de Educación Ambiental.

h) Un/unha vogal designado/a pola Federación Ecoloxista Galega.

i) Un/unha vogal designado/a pola Asociación para a Defensa Ecolóxica de Galicia.

l) Dous/dúas expertos/as de recoñecido prestixio no campo da educación ambiental, propostos/as pola Presidencia.

Disposición adicional única. *Obxectivo de igualdade*

No exercicio e desenvolvemento da aplicación deste decreto terase en conta a perspectiva de xénero.



Disposición derogatoria única. *Derrogación normativa*

Quedan derogadas as disposicións de igual ou inferior rango que se opoñan ao disposto neste decreto, en concreto queda derogada a Orde do 24 de xullo de 2014, pola que se nomean os membros do Observatorio Galego de Educación Ambiental.

Así mesmo, derrógase a Orde do 10 de decembro de 1984, sobre protección do acivro (*Ilex aquifolium*, L.) no territorio da Comunidade Autónoma de Galicia (DOG número 240, do 15 de decembro de 1984).

Disposición derradeira primeira. *Habilitación para o desenvolvemento normativo*

Autorízase a persoa titular da consellería competente en materia de ambiente para ditar as normas, nas materias da súa competencia, para o desenvolvemento e aplicación do presente decreto.

Disposición derradeira segunda. *Entrada en vigor*

Este decreto entrará en vigor aos vinte días naturais desde a súa publicación no *Diario Oficial de Galicia*.

Santiago de Compostela, dezaioito de xaneiro de dous mil dezaioito

Alberto Núñez Feijóo
Presidente

Beatriz Mato Otero
Conselleira de Medio Ambiente e Ordenación do Territorio

